

սայլերի առանցքները սապնելու համար, որ տարածված էին միայն այնտեղ, որտեղ բանում էին սայլերը: Չկան նաև հարևան Մեղրու շրջանում կարկէմից՝ դոդումից շինած և բազմազան նպատակների հատկացված ամաններ:

Երբ կավե, պղնձե կամ փայտե ամանը շունը լիզելով կամ մուկը մեջ բնկնելով կամ այլ պատճառից պղծվում էր, հարամվում էր, զանգեզուրցին ամանը հրլալըմ էր մէռնանուրալ՝ մեռնի ջրով: Դրա համար կամ եկեղեցուց բերում էր օրհնած ջրից, կամ տանը խմորի մեջ պահած մէռնանուրից: Մանուկը մկերտելուց հետո մնացած մեռնաջրով խմոր էին անում, խմորը չորացնում և մի քսակի մեջ դարադամի սյունից կախում: Հարկ եղած ժամանակ այդ խմորից կինը մի պատառ բաց էր անում ջրի մեջ և այդ նուրալ ըմանը հրլալըմ: Երբեմն այդ նպատակով բաց էին անում ջրի մեջ եկեղեցուց բերած նըշխարքը: